

Membudayakan Al-Quran Di Dalam Kehidupan

الْحَمْدُ لِلَّهِ الْمَلِكِ الْحَقِّ الْمُبِينِ الَّذِي أَبَانَ لِعِبَادِهِ مِنْ آيَاتِهِ مَا
بِهِ عِبْرَةٌ لِلْمُعْتَبِرِينَ وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ
لَهُ إِلَهَ الْأَوَّلِينَ وَالْآخِرِينَ وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ الْمَبْعُوثُ رَحْمَةً لِّلْعَالَمِينَ. اللَّهُمَّ صَلِّ عَلَى سَيِّدِنَا
مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا. أَمَّا بَعْدُ فَيَا
عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Saudara-saudaraku yang dikasihi Allah,

Marilah kita bertakwa kepada Allah s.w.t. dengan sebenarbenar ketakwaan. Taati segala perintah Allah serta hindarkanlah segala laranganNya dengan menghayati ajaran Al-Quran.

Sidang Jumaat sekalian,

Saya yakin, kesemua antara kita yang berada di masjid ini pasti memiliki paling-paling tidak senaskah Al-Quran di rumah masing-masing. Kita sering diingatkan bahawa Al-Quran merupakan panduan dan pedoman Allah s.w.t. untuk kita melalui surah Al-Isra' ayat 9:

إِنَّ هَذَا الْقُرْآنَ يَهْدِي لِلَّتِي هِيَ أَقْوَمُ وَيُبَشِّرُ
الْمُؤْمِنِينَ الَّذِينَ يَعْمَلُونَ الصَّالِحَاتِ أَنَّ لَهُمْ أَجْرًا

كَبِيرًا

Yang bermaksud: “Sesungguhnya Al-Quran ini memberi petunjuk ke jalan yang amat betul (agama Islam), dan memberikan berita yang mengembirakan orang-orang yang beriman yang beramal soleh, bahawa mereka beroleh pahala yang besar.”

Ayat ini menjelaskan kepada kita bahawa tujuan Al-Quran diturunkan adalah sebagai petunjuk dan hidayah bagi seluruh umat manusia. Oleh itu saudaraku, kita perlu selalu meneliti hubungan kita dengan Al-Quran. Apakah kita dalam waktu-waktu terakhir ini merujuk kepada Al-Quran mencari panduan dan bimbingan Allah di dalam mengharungi kehidupan kita? Apakah kita telah merenung kisah-kisah yang terkandung di dalam Al-Quran serta mengambil pelajaran daripadanya?

Kita tidak mahu saudara, untuk Al-Quran itu hanya dijadikan sebagai perhiasan rumah, atau sebagai hadiah simbolik buat hantaran pernikahan semata-mata mahupun hanya kedengaran bacaannya apabila berlaku kematian.

Kita perlu sedar saudara bahawa Al-Quran itu adalah yang pertama dan utama, ditujukan untuk orang yang masih hidup dan bukan untuk si mati. Tujuan Al-Quran adalah untuk memberi petunjuk kepada manusia di dalam kehidupan seharian mereka. Rasulullah s.a.w. pernah memberikan kita amaran melalui sabdanya:

فَمَنْ جَعَلَهُ أَمَامَهُ قَادَهُ إِلَى الْجَنَّةِ , وَمَنْ جَعَلَهُ خَلْفَهُ سَاقَهُ إِلَى النَّارِ

Yang bermaksud: *“Barangsiapa yang menjadikannya (yakni AlQuran) di hadapannya, Al-Quran itu akan membimbingnya ke Syurga. Barangsiapa yang menjadikannya di belakangnya, AlQuran itu akan menghalakannya ke nereka”*. [Hadith riwayat Ibn

Hibban]

Saudara yang saya kasihi,

Demi memastikan kita meraih manfaat daripada Al-Quran, kita perlu membudayakannya. Ini menuntut kita untuk memulakan dua langkah dasar seperti berikut:

Langkah Pertama: Pelajari bacaan Al-Quran.

Al-Quran adalah *Kalamullah* yang mulia yang menjadi ibadah bagi insan yang membaca dan mengamalkannya. Bayangkan saudara hanya dengan membacanya sahaja, kita sudah dijanjikan dengan pelbagai ganjaran dan kelebihan. Apatah lagi

ditambah dengan memahami, menghayati dan mengamalkan isi kandungannya. Allahu Akbar!

Saudara, bilakah kali terakhir mata kita menatap ayat-ayat suci yang datang daripada Allah s.w.t. ini. Apakah Al-Quran menjadi pengubat keresahan jiwa dan halwa telinga kita?

Dengan teknologi hari ini, hampir tiada alasan lagi untuk kita katakan yang kita tidak mempunyai akses kepada AlQuran. Jika dahulunya mungkin agak mencabar untuk membawa mushaf dan memastikan kita mempunyai wuduk setiap waktu, hari ini setiap daripada kita mempunyai telefon bijak yang boleh menyimpan aplikasi Al-Quran. Sebagaimana tangan kita tidak melepaskan telefon bijak kita, maka sekuat dan sekerap itu jugalah hendaknya kita berdamping dan mengambil manfaat daripada Al-Quran. Kita perlu menjadikan Al-Quran sebahagian daripada gaya hidup kita.

Luangkan sedikit masa dengan Al-Quran setiap hari saudara. Jika kita mungkin belum fasih membacanya sekurangkurangnya biasakanlah mendengar bacaan-bacaan merdu Al-

Quran yang boleh didapati dengan mudah di youtube dan sebagainya. Mulakan hari kita dengan alunan AlQuran dan akhiri juga hari kita dengan alunan Al-Quran.

Begitu juga dengan ahli keluarga kita. Sebagai contoh pada musim-musim cuti ini kita boleh menetapkan sebagai cabaran cuti sekolah untuk anak-anak kita membaca al-Quran setiap hari mengikut kadar yang sesuai dan tidak mengakibatkan mereka menjadi bosan. Ketika kita dalam perjalanan bercuti pastikan bacaan Al-Quran menjadi sebahagian senarai melodi yang dialunkan di dalam kenderaan kita. Ini akan memberi isyarat kepada anak-anak kita bahawa Al-Quran bukanlah kitab yang membosankan atau dialunkan dalam majlis-majlis rasmi sahaja. Apabila Al-Quran menjadi sebahagian daripada kehidupan keluarga ketika santai dan bercuti barulah kebiasaan untuk berdamping dengannya dapat kita bina sehinggakan menjadimenjadi minat.

Renungkanlah saudara, hadith Nabi s.a.w. yang ertinya:

“Sesiapa membaca Al-Quran dan ia mengamalkan kandungannya, pada hari kiamat kelak, Allah akan memakaikan mahkota kepada ibu bapanya. Cahaya mahkota ini lebih baik daripada cahaya matahari yang menerangi rumah-rumah di dunia. Maka bagaimana pendapat kamu mengenai orang (si anak) yang mengamalkan ini.” [Hadith riwayat Abu Daud]

Subhanallah! Lihatlah betapa mulianya dan besarnya penghormatan yang Allah berikan kepada ibu bapa yang telah bersusah payah mendidik anak-anaknya untuk mendekati dan menyayangi Al-Quran. Sabda Nabi Muhammad s.a.w. tadi

hanyalah menggambarkan ganjaran kurniaan Allah kepada ibu bapanya yang dilayan seperti tetamu terhormat oleh Allah; bayangkan bagaimana hebat dan tingginya ganjaran Allah buat si anak yang mengamalkan Al-Quran itu?

Jika kita melihat realiti kehidupan, kita mendapati masa dan tenaga kita banyak dihabiskan pada pekerjaan. Oleh itu, kita perlu mengkhususkan masa untuk membaca Al-Quran bersama keluarga. Jangan biarkan anak-anak dan keluarga kita jauh daripada kitab suci ini saudara kerana ia sumber keberkatan. Rasulullah s.a.w. bersabda yang bermaksud:

“Banyakkanlah membaca Al-Quran. Sesungguhnya rumah yang tidak dibacakan Al-Quran akan sedikit kebaikan padanya, akan banyak keburukan di dalamnya dan akan menyempitkan dan menyusahkan penghuninya.” [Hadith riwayat Al-Daruqutni]

Saudara yang dirahmati Allah,

Langkah kedua setelah kita membiasakan diri membaca AlQuran adalah pentingnya mengamalkan ajarannya.

Dalam hadith yang saya kongsikan tadi, Nabi s.a.w. menyatakan: *“...Sesiapa membaca Al-Quran dan ia mengamalkan kandungannya”*. Oleh itu, usaha untuk mengamalkan ajaran Al-Quran itu merupakan kunci kedua untuk kita meraih kebaikan serta keberkatan daripadanya.

Namun untuk memastikan kita dapat mengamalkan Al-Quran dengan baik kita perlu memahami bagaimana untuk memahami ajarannya. Kita perlu memahami apakah kisah-kisah yang ada di dalamnya, apakah tema-tema utama al-Quran yang mempunyai kaitan dengan kehidupan seharian kita dan keluarga.

Imam Ibn Kathir menukilkan dalam kitab tafsirnya berkaitan amalan yang diriwayatkan dari Saidina Uthman bin Affan dan Abdullah ibn Mas'ud: Bahawasanya para Sahabat apabila mempelajari Al-Quran daripada Nabi s.a.w., mereka akan mempelajari hanya sepuluh ayat pada satu masa. Mereka tidak akan berpindah kepada sepuluh ayat yang berikutnya sehinggalah mereka selesai mempelajari kandungannya dan mengamalkannya.

Saudara, jadikanlah Ramadan yang akan tiba kali ini sebagai pencetus keazaman bagi diri kita untuk mempelajari bacaan AlQuran dan menghayati isi kandungannya. Ikutilah kelas-kelas agama berkaitan Al-Quran dan pemahamannya yang dianjurkan oleh pelbagai masjid sepanjang tahun bermula dari sekarang lagi. Pastikan anak-anak kita mendapatkan pendidikan Al-Quran yang lengkap. Semoga Allah Ta'ala memberkati usaha kita dan menjadikan Al-Quran sebagai penghias diri dan keluarga kita sekaligus sumber keredhaan dan keberkatanNya buat kita semua di dunia dan akhirat. Amin.

بَارَكَ اللهُ لِي وَلَكُمْ فِي الْقُرْآنِ الْعَظِيمِ ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ
السَّمِيعُ الْعَلِيمُ ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ ،
وَلِسَائِرِ الْمُسْلِمِينَ وَالْمُسْلِمَاتِ ، وَالْمُؤْمِنِينَ وَالْمُؤْمِنَاتِ ،
فَاسْتَغْفِرُوهُ فَيَا فَوْزَ الْمُسْتَغْفِرِينَ وَيَا نَجَاةَ التَّائِبِينَ .